



Á ALCALDESA-PRESIDENTA DO CONCELLO DA CORUÑA
AO PLENO DA CORPORACIÓN

O Grupo Municipal da Marea Atlántica, a través da súa voceira, María García Gómez, ao abeiro do Regulamento Orgánico Municipal do Concello da Coruña, presenta a seguinte **MOCIÓN** sobre a **vacinación das traballadoras do SAF**.

EXPOSICIÓN DE MOTIVOS

O Servizo de Axuda no Fogar (SAF) é un servizo público que presta atención ás persoas maiores e dependentes na súa propia casa, para facilitar o seu desenvolvemento persoal, especialmente cando teñen limitacións para asumir actividades básicas vida diaria e a socialización.

Segundo a Plataforma SAF Galiza, na Coruña hai aproximadamente 300 traballadoras prestando este servizo, nun sector que leva décadas infravalorado, feminizado, con baixos salarios e, en xeral, precarizado. É un reflexo do escaso valor social que se lles outorga aos coidados, pese a seren fundamentais para sostener a vida.

Pero se a situación das traballadoras do SAF non era idílica antes da pandemia da COVID19, agora achégase a estremos insostibles. As medidas de prevención que tomaron as empresas e as administracións públicas para protexelas foron e son insuficientes, cando non inexistentes. Aínda hoxe, una empregada do SAF conta cunha única máscara cirúrxica por domicilio e día, pese a que non poden manter as distancias de seguridade e, en moitos casos, a persoa á que coidan quita a súa máscara para comer ou tomar a medicación. Nalgúns casos, como xa denunciou o sector ante a Valedora do Pobo, as empresas obrigan a asinar que se recibe o material de prevención sen indicar nin o tipo nin o número de unidades, como un xeito de cubrirse as costas.

É moi grave que isto aconteza cando o labor das traballadoras do Servizo de Axuda no Fogar durante esta pandemia está sendo imprescindible. Nun momento como o actual, de medo, incerteza, saturación dos servizos públicos, medidas restritivas e mobilidade reducida, as persoas atendidas polo SAF están nunha situación moi vulnerable. Hai usuarias illadas das súas familias para evitar contaxios ou por que residen en concellos separados. Ou que non contan con rede de apoio, só coas traballadoras que as visitan un número de horas á semana.

Na súa actividade diaria, as traballadoras do SAF constatan o deterioro físico e cognitivo das persoas usuarias do servizo durante a pandemia está sendo moi alarmante, con cadros de depresión e ansiedade que complican as patoloxías e problemas que xa viñan sufrindo.



Todo isto xa o escoitamos neste salón de Plenos. En xullo do 2020 desde o Escano Cidadán, deu testemuño dunha destas traballadoras do SAF. Explicou en detalle as tarefas que levan a cabo, dende acompañamentos, curas, aseos, alimentación, administración da medicación, estimulación física e cognitiva... ademais da limpeza e mantemento do fogar. Son un soporte psicolóxico fundamental. Todo por un salario medio de 800 euros ao mes.

Non se están a resolver os problemas propios da pandemia, nin tampouco os que viñan herdados de antes. As empresas ás que o Concello lle subcontrata o SAF non ofrecen axudas técnicas como camas articuladas ou grúas para trasladar ás persoas con mobilidade reducida, obrigando ás traballadoras a un esforzo físico elevado e reiterado.

Para poder ofrecer un servizo de calidade as persoas usuarias e as súas familias, temos que garantir unha condicións dignas para as traballadoras do Servizo de Axuda no Fogar. E máis tendo en conta que a poboación dependente na nosa cidade non deixa de ir en aumento. Os datos do Observatorio Urbano indican que o índice de sobreenvellecemento na Coruña aumentou nun 31% nesta década, pasando do 12,7 a un 16,7. Tamén medrou un 25,4% o índice de dependencia xeral, dun 46,4 a un 58,2 nos últimos dez anos.

O papel das traballadoras do SAF e o seu carácter fundamental para a vida foi recoñecido noutras cidades e comunidades como Cádiz, Granada, Cuenca, Aragón e Navarra, que as incluiron nas primeiras quendas de vacinación fronte á COVID. Están en contacto diario con persoas que de por sí xa son un grupo de risco nesta pandemia, e prestan servizo en diferentes domicilios no mesmo día. Unha persoa usuaria do SAF, ao longo dunha semana, pode ter ata seis auxiliares diferentes no seu fogar, e estas auxiliares poden ter ata 5 domicilios cada xornada. Polo tanto, é necesario incluíllas como prioritarias nas quendas de vacinación como medida de prevención de contaxios ás persoas usuarias.

Por todo o anterior, propoñemos ao Pleno da Corporación os seguintes acordos,

ACORDOS

1 .- Instar ao Concello de A Coruña a:

- Implementar unha campaña de información e sensibilización coas familias, traballadoras e usuarias do SAF sobre a necesidade de aplicar as medidas de prevención do Covid19 cando as traballadoras están nos domicilios.
- Realizar unha fiscalización das empresas concesionarias do Servizo de Axuda no Fogar a fin de asegurar o bo funcionamento do servizo e garantir o cumprimento dos dereitos laborais das auxiliares.
- Facilitar tarxetas da O.R.A para os vehículos das traballadoras que teñen que acudir a domicilios nos que está implantada a zona O.R.A , xa que co tempo previsto para os desplazamentos, a localización das vivendas e as frecuencias do transporte público que imposibilitan o seu uso, en moitas ocasións teñen que utilizar servizos de parking privados inasumibles co salario que perciben polo seu traballo.



- Incorporar nos pregos do servizo criterios sociais como condicións esencias de execución que outorguen unha maior puntuación ás empresas/entidades que se comprometan coa mellora das condicións laborais das traballadoras.

2 .- Instar a Xunta de Galicia a:

- Incluir ás traballadoras do servizo a domicilio de xeito prioritario no plan de vacinación da Sars-COV2.
- Realizar un test PCR mínimo mensualmente as traballadoras.
- Incrementar o prezo/hora do servizo que actualmente se atopa en 9,70€/hora, e que este incremento revirte na prestación do servizo e nas condicións laborais das traballadoras.
- Establecer un prezo/hora mínimo que garanta a calidad do servizo, evitando a disparidade de prezos e a externalización do servizo con ofertas que supoñen baixas temerarias.

A Coruña a 25 de xaneiro de 2021

María García Gómez

Voceira do GM Marea Atlántica